



LATOUR VEYER ^{15 ME 2013}
PE ANONS RWAYONM ZEOVA

15-21 Zilyet

**Ranforsi ou maryaz
par annan en bon kominikasyon**

PAZ 3 KANTIK: 36, 87

22-28 Zilyet

**Paran ek zanfán,
kominik avek lanmour**

PAZ 13 KANTIK: 88, 3

29 Zilyet– 4 Out

**Protez ou leritaz
par fer bann bon desizyon**

PAZ 23 KANTIK: 14, 134

LARTIK LETID

■ **Ranforsi ou maryaz par annan en bon kominikasyon**

■ **Paran ek zanfan, kominik avek lanmour**

Pour annan en maryaz e en lavi fanmir ere i enportan ki en koup i annan en bon kominikasyon. Sa premye lartik i fer nou vwar de kalite ki kapab ed nou pour byen kominike. Sa dezyenm lartik i montre sa ki nou kapab fer pour sirmont bann baryer ki anpes annan en bon kominikasyon ant paran ek zanfan.

■ **Protez ou leritaz par fer bann bon desizyon**

Ki leritaz spirityel bann Kretyen i annan? Ki nou kapab aprann lo nou leritaz atraver legzanp Ezai? Ki pa nou bezwen pran ki pou ed nou fer sa bon swa konsernan nou leritaz? Sa lartik i reponn sa bann kestyon.

Ranforsi ou maryaz par annan en bon kominikasyon

*“En parol ki ganny dir dan son moman apropiye,
i parey ponm lor dan bann skilptir annarzan.”*

—PROV. 25:11.

KI OU POU REPONN?

Dan ki fason demontre bon zizman i ede pour ki i annan en bon kominikasyon dan maryaz?

Akoz bann dimoun ki’n marye i bezwen demontre respe pour kanmarad?

Ler bann dimoun ki’n marye i devlop limilite, ki lefe sa i kapab annan dan maryaz?

EN FRER Kanada ti dir: “Mon ti pou pli kontan pas letan avek mon madanm ki okenn lezot dimoun. Mon lazwa i ogmante e mon soufrans i diminyen ler mon madanm i dan mon kote.” En msye Lostrali ti ekri: “Pandan sa 11 an ki nou’n marye, i pa’n zanmen pas en sel zour ki mon pa’n koz avek mon madanm. Nou napa okenn dout oubyen lenkyetid ki nou maryaz pa solid. Nou abitye annan en bon kominikasyon e sa i en premye rezon ki fer nou maryaz solid.” En ser Costa Rica i dir: “Lefet ki nou annan en bon kominikasyon sa pa’n zis

1. Ki manner en bon kominikasyon i ede dan maryaz?

anrisi nou maryaz, me in osi ed nou vin pli pros avek Zeova, protez nou pour pa tonm dan tantasyon, ini nou konman en koup e fer nou lanmour pour kanmarad vin pli for.”

² Eski ou ek ou konzwen zot annan sa bon kominikasyon ou-byen pour zot sa i en defi? I vre, bann sityasyon difisil i kapab leve dan maryaz, akoz maryaz i en linyon ant de dimoun enparfe ki annan diferan personalite, e zot annan bann tre ki reflekte zot kiltir e fason ki zot in ganny elve. (Rom. 3:23) Deplis, en koup marye i kapab annan diferan fason kominike. I pa pour nanryen ki John Gottman ek Nan Silver, de dimoun ki fer resers lo maryaz i dir: “I demann kouraz ek determinasyon pour gard en relasyon maryaz ki dirab.”

³ I demann bokou zefor pour fer en maryaz reisi, me a lafen di zour sa i anmenn en kantite lazwa. Bann konzwen ki kontan kanmarad i vreman kapab trouv lazwa dan zot maryaz. (Ekle. 9:9) Annou vwar bon legzanp lavi maryaz Izaak ek Rebeka. (Zen. 24:67) Menm apre ki en serten letan ti’n pase depi ki zot ti’n marye, napa okenn par dan Labib ki donn nou lenpresyon ki zot ti nepli kontan kanmarad parey avan. Nou kapab dir menm keksoz konsernan bokou koup marye ozordi. Ki zot sekre? Zot in aprann pour eksprim zot panse ek santiman avek kanmarad dan en fason onnet, me dan en fason zantiy. Pour arive fer sa zot in bezwen devlop e demontre bon zizman,

2. Ki fakter ki anpes annan en bon kominikasyon?

3. Kwa ki kapab ed bann koup marye ranforsi zot maryaz?

lanmour, profon respe, e limilite. Nou pou vwar aprezan ki ler sa bann kalite i ganny demontre dan maryaz sa i fer li fasil pour annan en bon kominikasyon.

ANNAN BON ZIZMAN

4 Proverb 16:20 i dir: “Sa enn ki annan bon zizman dan en sityasyon pou vwar sa ki bon.” Sa parol i vre an sa ki konsern maryaz ek lavi fanmir. (*Lir Proverb 24:3.**) Parol Bondye i sa meyer sours bon zizman ek lasazes. Zenez 2:18 i dir nou ki Bondye ti kre madanm pour ki i vin en led pour son msye me pa son fotokopi. Nou vwar byen son rol dan lafason ki i komi-nike. I vre ki sak dimoun i diferan, me normalman bann madanm i kontan eksprim zot santiman, zot konsernen avek relasyon ki dimoun i annan avek kanmarad. Zot apresye bann bon konversasyon amikal, akoz sa i reasir zot ki lezot i kontan zot. De lot kote, bokou msye pa tro kontan koz lo zot santiman, zot pli kontan koz lo bann aktivite, problem ek solisyon, me bann msye i oule ganny respekte.

5 En ser Grannbretanny i dir: “Mon msye i oule rezourd problem deswit olye pran letan pour ekout mwan. Sa i kapab vreman fer mwan fristre, mon zis anv i ‘en tas dite e ki i senpatiz avek mwan.’” En msye ti ekri: “Kan mon madanm ek mwan

* Proverb 24:3: “Par lasazes en fanmir i ganny batir e par disernman i pou ganny etabli solidman.”

4, 5. Ki mannyer bon zizman i kapab ed en koup konpran kanmarad pli byen? Donn legzanp.

ti'n fek marye, mon ti annan sa tandans taye pour rod solisyon pour nenport problem ki i ti annan. Me, vitman mon ti konpran ki i ti zis vreman anv i ki mon ekout li.” (Prov. 18:13; Zak 1:19) En msye ki annan bon zizman i pran an konsiderasyon santiman son madanm e i esey rod sa fason apropiye pour koz avek li. Ler i fer sa, i reasir son madanm ki son panse ek santiman i annan valer pour li. (1 Pyer 3:7) An retour, sa madanm i esey konpran pwennvi son msye. Kan msye ek madanm i konpran, apresye e desarz zot responsabilite dapre Labib, zot form en zoli koup. Deplis, zot kapab travay ansanm pour fer e aplik bann desizyon saz e ekilibre.

6 En koup ki annan bon zizman i osi konnen ki i annan “en letan pour reste trankil e en letan pour koze.” (Ekle. 3:1, 7) En ser ki'n marye depi di-z-an i fer sa remark: “Aprezan mon'n realize ki parler i pa apropiye pour koz lo en topik. Si mon msye i annan en ta louvraz oubyen responsabilite, mon les en pe letan pase avan ki mon lev serten topik. Sa i fer nou annan bann konversasyon pli amikal.” Bann madanm ki annan bon zizman i koz avek ladouser e konsyan ki bann parol byen swazir “ki ganny dir *dan son moman apropiye*” i atiran e ganny apresye.—*Lir Proverb 25:11*.*

* Proverb 25:11: “En parol ki ganny dir dan son moman apropiye, i pa rey ponm lor dan bann skilptir annarzan.”

6, 7. (a) Dan ki fason sa prensip dan Eklezyast 3:7 i kapab ed en koup pour annan bon zizman? (b) Ki mannyer en madanm i demontre disernman e ki zefor en msye i devret fer?

7 En msye Kretyen i devret fer son par, i pa devret zis ekout son madanm me i osi devret fer zefor pour eksprim son santi-man klerman. En ansyen ki'n marye depi 27 an i dir: "I demann bokou zefor pour mwan arive eksprim sa ki dan fon mon leker avek mon madanm." En frer ki'n marye depi 24-r-an i fer sa remark: "Mon kapab gard keksoz anndan, par mazine, 'Si mon pa koz lo mon problem, sa problem pou disparet.' Me, mon'n realize ki i pa en febles pour eksprim mon santiman. Kan mon fer zefor pour eksprim sa ki mon santi, mon priye pour servi sa bon parol e sa bon fason pour dir zot. Apre mon pran en gran respirasyon e konmans koze." Sa ki osi ede, se pour swazir sa bon moman, petet ler zot tousel pe egzamin teks pour lazournen oubyen pe lir Labib.

8 I enportan ki msye ek madanm i priye e annan sa dezir pour amelyor lafason ki zot kominike. Definitivman, i difisil pour sanz bann vye labitid. Me ler en koup i kontan Zeova, demann li son lespri sen, e konsider zot maryaz sakre, zot annan en motivasyon ki bokou dimoun napa. En madanm 26 an ti ekri: "Mon msye ek mwan nou pran pwennvi Zeova lo maryaz o serye, alor nou pa ni menm mazin separe avek kanmarad. Sa i fer nou fer plis zefor pour rezourd nou problem e pran letan pour koz lo la ansanm." Ler nou demontre sa kalite

8. Ki lezot motivasyon bann koup Kretyen i annan pour fer zot maryaz re-isi?

lwayote ek devosyon anver Bondye, nou fer li plezir e an retour i beni nou.—Ps. 127:1.

ANNAN PLIS LANMOUR

9 Lanmour i sa kalite pli enportan dan maryaz, i “soud tou keksoz parfetman ansanm dan larmoni.” (Kol. 3:14) Vre lanmour i ogmante anmezir ki sa koup i eksperyans lavi ansanm, dan botan e dan movetan. Zot vin zanmi pli pros e kontan pas letan ansanm. Sa kalite maryaz pa ganny batir zis avek detrwa bon aksyon parey nou vwar dan medya, me par en kantite pti aksyon. Par egzanp, ler sa koup i may kanmarad, fer en remark zantiy, azir dan en fason ki montre ki zot in refle-sir davans, fer en zoli sourir, oubyen demann senserman “ki manner ou lazournen in pase?,” sa i bann *pti* keksoz ki kapab fer en *gran* diferans dan maryaz. En msye ki’n marye pour 19 an i dir ki li ek son madanm zot kontan telefonn oubyen teks kanmarad pandan lazournen zis pour vwar ki manner keksoz pe ale.

10 Lanmour i motiv en koup pour kontinyen aprann konn kanmarad. (Fili. 2:4) Sa konnesans an retour i fer zot lanmour vin pli for malgre zot lenperfeksyon. En maryaz ki reisi i amelyore avek letan, e vin pli for, me i pa reste parey i ti ete o konmansman. Si ou’n marye, demann ou lekor sa bann kestyon: ‘Eski mon vreman konn mon konzwen? Eski mon konn son

9, 10. Dan ki fason pratik en koup i kapab ranforsi zot lanmour?

santiman ek son fason panse? Konbyen fwa mon mazin li, petet reflexir lo son bann kalite ki ti atir mwan anver li?’

DEVLOP RESPE

11 I pa egziste en linyon parfe menm dan sa maryaz pli ere, e kantmenm sa koup i kontan kanmarad zot pa pou touzour annan menm pwennvi. Abraam ek Sara pa ti tonm dakor lo tou keksoz. (Zen. 21:9-11) Me malgre ki zot ti annan pwennvi diferan parler, sa pa ti kre en baryer ant zot. Akoz? Zot ti tret kanmarad avek dinyite ek respe. Par egzanzp, Abraam ti dir “silvouple” avek Sara. (Zen. 12:11, 13) Tandis ki Sara, i ti obeir Abraam e konsider li konman son “senyer” dan son leker. (Zen. 18:12) Souvan nou remarke ki en koup i mank respe pour kanmarad dan lafason ki zot koze e zot ton lavwa. (Prov. 12:18) Si zot pa travay lo sa problem, zot maryaz pou an danze.—*Lir Zak 3:7-10, 17, 18.*

12 Bann dimoun ki fek marye i devret sirtou travay dir pour koz dan en fason zantiy e avek respe, sa pou kre en bon lanbyans pour ki i fasil pour zot kominike dan en fason onnet. En msye i rapel: “Kantmenm bann premye lannen maryaz i kapab gou, parler i kapab annan bann dezapwentman. Anmezir ki ou konmans abitye avek santiman, labitid, ek bezwen ou madanm e li avek sa ki pour ou, i kapab annan serten pti problem ki

11. Akoz respe i en faktor enportan pour en maryaz reisi? Eksplike.

12. Akoz i enportan pour bann dimoun ki fek marye travay dir pour aprann koz avek respe?

leve ant zot de. Me si zot azir dan en fason rezonnab, pa pran tou keksoz o serye, demontre limilite, annan pasyans e depan lo Zeova, zot pou kapab tenir ferm.” Sa i sirman vre!

DEMONTRE VRE LIMILITE

13 En bon kominikasyon dan maryaz i parey en pti sours delo ki pe koule dousman e trankilman dan en zarden. En dimoun ki “viv avek limilite” i zwe son rol pour ki sa delo i kontinyen koule. (1 Pyer 3:8) En frer ki’n marye pour 11 an i dir: “Limilite i sa mwayen pli fasil pour rezourd bann problem, akoz i motiv ou pour dir: ‘Eskiz mwan.’” En ansyen ki’n marye pour 20-t-an i fer sa remark: “Parler sa mo ‘eskiz mwan’ i pli enportan ki ‘Mon kontan ou.’” I ti osi azoute: “En fason pli fasil pour demontre limilite i lapriyer. Ler nou de mon madanm nou priy Zeova, nou rapel ki nou enparfe e ki nou bezwen labonte ekstraordiner ki Bondye i demontre. Sa rapel saz i ed mwan vwar keksoz dan sa bon fason.”

14 Par kont, lorgey pa anmenn lape. I fer kominikasyon difisil e anpes en dimoun annan sa lanvi ek kouraz pour demann leskiz. O kontrer, olye annan limilite pour dir: “Eskiz mwan, silvouple pardonn mwan,” en dimoun orgeye i rod leskiz. Olye annan sa kouraz pour aksepte son febles, i konsantre lo defo sa lot dimoun. Kan en dimoun i bles li, olye rod

13. Akoz limilite i en fakter enportan dan maryaz?

14. Ki mannyer lorgey i kapab afekte en maryaz?

lape, i ofanse, petet menm reponn dan en fason dir oubyen aret koz avek sa lot dimoun. (Ekle. 7:9) Wi, lorgey i kapab danzere pour en maryaz. I byen pour rapel ki “Bondye i opoz bann ki annan lorgey me i donn son lagras bann ki annan limilite.”—Zak 4:6.

15 Byensir, i bet pour mazine ki lorgey pa pou zanmen egziste dan maryaz. Nou devret rekonnet sa tandans e azir deswit. Pol ti dir avek son bann konpanyon Kretyen: “Pa les zot lakoler dire ziska aswar. Pa les dyab pran lavantaz lo zot.” (Efe. 4:26, 27) Si nou pa ekout Parol Bondye, nou kapab sibir soufrans pour nanryen. En ser ti fer sa komantr tris: “Souvandfwa mon msye ek mwan nou pa ti aplik sa konsey dan Efezyen 4:26, 27. Kan sa ti arive, mon ti pas bann pli move lannwit!” Pa i ti pou pli mye diskrit keksoz ansanm deswit avek bi pour rekonsilye! Byensir, sa de konzwen i bezwen donn kanmarad letan pour ki presyon i diminyen. I pli apropiye osi pour priy Zeova pour ed ou annan sa bon leta les-pri. Sa i enkli annan limilite, e koumsa ou pa pou konsantre lo ou me lo sa problem, si non sa sityasyon pou vin pli pir. —*Lir Kolosyen 3:12, 13.*

16 En dimoun ki modes e annan limilite pou konsantre lo

15. Eksplike ki mannyer aplik sa prensip dan Efezyen 4:26, 27 i kapab ed en koup marye fer fas avek bann problem ki kapab leve ant zot.

16. Ki mannyer limilite i kapab ed en koup pour vwar pwen for kanmarad dan sa bon fason?

pwen for son konzwen. Pour donn en legzanp: Meton en madanm i annan en talan spesyal ki i servi pour byennet son fanmir. Si son msye i annan limilite e i modes, i pa pou santi konmsi son madanm pe fer konpetisyon avek li, me i pou ankouraz li pour servi son don, e sa pou montre ki son madanm i annan valer pour li e ki i apresye li. (Prov. 31:10, 28; Efe. 5:28, 29) An menm tan, en madanm ki annan limilite e ki modes pa pou demonstre, ni abes son msye. Apre tou, zot tou le de zot “en sel laser” e sa ki bles enn i bles lot.—Mat. 19:4, 5.

17 San dout ou anvi ki ou maryaz i parey sa ki ti pour Abram ek Sara oubyen Izaak ek Rebeka, en maryaz ki vreman ere e dirab e ki anmenn louanz pour Zeova. Alor, kontinyen annan menm pwennvi ki Bondye lo maryaz. Rod lasazes ek bon zizman dan son Parol. Devlop “laflanm Ya,” setadir sa vre lanmour par reflexir avek lapresyasyon lo ou konzwen. (Sal. 8:6) Fer bokou zefor pour devlop limilite. Tret ou konzwen avek respe. Si ou fer tousala, ou pou trouv lazwa dan ou maryaz e rezwir leker ou Papa ki dan lesyel. (Prov. 27:11) Definitivman, ou santiman pou parey sa msye ki’n marye pour 27 an ki ti ekrir: “Mon pa kapab mazin lavi san mon madanm. Nou maryaz pe kontinyen vin pli for sak zour. Sa i aköz nou lanmour pour Zeova e nou kominikasyon regilye avek kanmarad.”

17. Kwa ki kapab fer en maryaz ere ozordi e anmenn louanz pour Bondye?

Paran ek zanfan, kominik avek lanmour

“Tou dimoun i devre pare pou ekoute, me pran letan avan koze, avan pran lakoler.”—ZAK 1:19.

KI OU POU REPONN?

Akoz i enportan pour servi byen nou letan pour kominike?

Ki manner bann paran i kapab aplik Zak 1:19?

Ki manner bann zanfan i kapab aplik Zak 1:19?

“SI OU ti aprann ki ou paran pe al mor demen, ki ou ti pou pli anvè dir zot ozordi?” Sa kestyon ti ganny demande avek plizyer santenn zanfan Leta-z-ini. Olye konsantre lo problem oubyen dezakor ki ti kapab pe fatig zot, sa liv ki annan pour tit *For Parents Only*, ki’n ganny ekri par Shaunti Feldhahn ek Lisa Rice i fer resorti ki a pepre 95 pousan ti dir ki zot ti pou dir zot paran: “Eskiz mwan” e “Mon kontan ou en kantite.”

2 Normalman, zanfan i kontan zot paran e paran i kontan zot zanfan. Sa i sirtou le ka dan bann fanmir Kretyen. Kantmenm paran ek zanfan i vreman anvè vin pli pros avek

1, 2. Ki santiman paran ek zanfan i normalman annan pour kanmarad, me ki serten difikilte zot souvan rankontre?

kanmarad, parfwa zot vwar li difisil pour kominike. Akoz paran ek zanfan i evite koz lo serten topik menm si zot annan en bon kominikasyon e koz fran avek kanmarad? Ki serten baryer ki anpes annan en bon kominikasyon? Ki mannyer zot kapab sirmont sa difikilte?

“SERVI BYEN” LETAN POUR KOMINIKE

3 En kantite fanmir i vwar li difisil pour trouv sifizaman letan pour fer bann bon konversasyon. Sa pa'n touzour le ka. Moiz ti dir bann papa Izraelit: “Ou bezwen fer [parol Bondye] antre dan ou garson e koz lo la ler ou pe asize dan ou lakaz, ler ou pe marse lo semen, ler ou pe alonze e ler ou leve.” (Det. 6:6, 7) Zanfan ti pas letan swa avek zot manman kot lakour ouswa avek zot papa dan plantasyon oubyen son landrwa travay. Paran ek zanfan ti annan bokou letan pour pas ansanm e pour koze. I pour sa rezon ki i ti posib pour bann paran Izraelit konn bezwen, dezir ek personnalite zot zanfan. Pareyman, i ti annan ase letan ek loportinite pour bann zanfan konn zot paran byen.

4 Pa i vreman diferan ozordi! Dan serten pei, bann zanfan i konmans al lekol byen boner, parfwa zot annan zis dez-an. I annan en kantite papa ek manman ki travay lwen

3. (a) Akoz bon kominikasyon i en defi pour en kantite fanmir? (b) Akoz i pa ti en problem pour bann fanmir Izraelit pas letan ansanm?

4. Akoz i difisil pour en fanmir ozordi annan en bon kominikasyon?

avek zot lakour. Sa ptigin letan ki paran ek zanfan i ansanm, souvan konpiter, televizyon oubyen lezot keksoz elektronik i anpes zot kominike. Dan bokou ka, zanfan ek paran i viv sakenn pour li, konmsi zot pa konn kanmarad. Apenn si zot fer en bon konversasyon.

5 Eski ou kapab “servi byen” sa letan ki ou pase pour fer lezot keksoz pour pas plis letan avek ou fanmir? (*Lir Efezyen 5:15, 16.*) Serten fanmir i dakor pour limit lakantite letan ki zot pase pour get televizyon oubyen servi konpiter. Lezot i esey fer zefor pour pran omwen en repa ansanm sak zour. Pa laranzman ladorasyon fanmir i en bon loportinite pour paran ek zanfan vin pli pros avek kanmarad e pour diskit lo bann size spirityel trankilman ansanm! Si ou met dekote enn erdtan sak semenn pour ladorasyon fanmir sa i en bon konmansman, me pour arive annan bann bon konversasyon ou bezwen fer plis ki sa. Sanmenm sa rezon ou bezwen kominik plis e regilyerman. Avan ki ou zanfan i al lekol, dir li en keksoz ankourazan, diskit teks pour lazournen, oubyen priy ansanm avek li. Si ou fer sa, i kapab ki ou pou ed ou zanfan pas en pli bon lazournen.

6 Serten paran in kapab fer serten sanzman dan zot lavi pour kapab pas plis letan avek zot zanfan. Par egzanp, 5, 6. Ki mannyer serten paran i “servi byen” sa letan ki zot annan pour pas plis letan avek zot zanfan?

Laura,* en manman ki annan de pti manrmay, ti kit en louvraz a plen tan pour kapab fer sa. I ti dir: “Dan bomaten nou tou nou ti pe depese pour al travay oubyen lekol. Kan mon ti retourn kot lakour aswar, sa nennenn ti’n fini fer manrmay dormi. Lefet ki mon ti kit sa travay, nou ti bezwen viv avek mwens larzan, me mon santi ki mon konn pli byen problem e sa ki pe pase dan lespri mon bann zanfan. Mon ekout sa ki zot dir dan lapriyer e mon kapab gid, ankouraz e ansenny zot.”

‘PARE POUR EKOUTE’

7 Apre ki i ti entervyou en kantite zenn, loter sa liv *For Parents Only* ti remark en lot baryer ki anpes annan bon kominikasyon. Sa de ekriven i dir: “Premye keksoz ki sa bann zenn ti konplent konsernan zot paran ti, ‘Zot pa ekoute.’” Nou pa kapab blanm zis bann paran akoz zot osi zot souvan konplent ki zot zanfan pa ekoute. Pour gard sa bon kominikasyon, sak manm fanmir i bezwen vreman ekout kanmarad.—*Lir Zak 1:19*.

8 Paran, eski ou vreman ekout ou zanfan? I kapab difisil pour fer sa sirtou ler ou fatige oubyen sa konversasyon pa paret enportan. Me petet sa ki pa paret enportan pour ou,

* Non in ganny sanze.

7. Ki konplent paran ek zanfan i fer?

8. Ki mannyer paran i kapab vreman ekout son zanfan?

i enportan pour ou zanfan. Kan nou dir ki en paran i “pare pou[r] ekoute” sa i vedir ki i pa zis enterese avek sa ki sa zanfan i dir me i bezwen osi enterese avek sa ki sa zanfan i santi. Ton lavwa ek zes ki sa zanfan i fer i kapab ed bann paran pour konpran pli byen ki mannyer sa zanfan i santi konsernan sa size ki i pe koz lo la. I osi enportan pour demann kestyon. “Panse en dimoun i parey delo dan en pwi profon, me sa enn ki annan bon zizman i kapab retir li.” (Prov. 20:5, *Today’s English Version*) Pour arive fer bann zanfan koz lo bann topik ki zot vwar difisil pour aborde i enportan ki paran i servi bon zizman ek disernman.

9 Zanfan eski ou obeir ou paran? Parol Bondye i dir: “Mon garson, ekout disiplin ou papa e pa abandonn lalwa ou manman.” (Prov. 1:8) Zanfan, pa oubliye, ou paran i kontan ou e i annan ou lentere aker, alor i saz pour ekout e obeir zot. (Efe. 6:1) I pli fasil pour obeir kan i annan en bon kominikasyon e ler ou konnen ki ou paran i kontan ou. Dir ou paran ki mannyer ou santi. Sa pou ed zot konpran ou. Byensir, ou osi ou devret esey konpran zot.

10 Kot i konsern ekout konsey lezot zenn ki menm laz avek ou, fodre fer byen atansyon. Zot kapab dir ou sa ki ou anvi tande, me zot konsey pa pou ed ou ditou. Anfet, zot

9. Akoz zanfan i devret ekout zot paran?

10. Ki nou aprann avek sa resi Labib lo Reabam?

menm kapab fer ou ditor. Lefet ki zot napa lasazes ek leksperyans ki en dimoun ki pli aze i annan, laplipar zenn pa get keksoz lwen e akoz sa, zot pa konnen ki konsekans serten aksyon i kapab anmennen plitar. Mazin legzanp Reabam, garson Lerwa Salomon. Kan i ti vin lerwa Izrael, i ti pou'n saz si i ti swiv konsey bann zonm aze. O kontrer, i ti swiv konsey bann zenn ki i ti'n grandi avek. Alor i ti perdi sipor laplipar sitwayen son Rwayonm. (1 Rwa. 12:1-17) Olye imit move latitud Reabam, fer tou sa ki ou kapab pour gard en bon kominikasyon avek ou paran. Koz avek zot lo sa ki oupanse. Swiv konsey ki zot donn ou e aprann pour vin saz parey zot.—Prov. 13:20.

11 Paran si ou pa anvi ou zanfan i rod konsey avek zot bann kanmarad, ou devret en dimoun abordab ki fasil pour koz avek. En ser adolesan ti ekrir: “Desito ki mon nonm non en garson, mon paran i mal alez. Sa i fer mwan mal alez osi e mon ezite pour kontinyen koz avek zot.” En lot ser ti ekrir: “En kantite zenn i anvi ganny konsey avek zot paran, me si zot paran pa pran zot o serye, sa bann zanfan pou al rod konsey kot en lot dimoun ki mwen eksperyanse.” Si ou pare pour ekout ou zanfan e konpran zot lo nenport topik ki zot anvi koz lo la, ou pou vwar ki zot pou alez pour eksprim zot santiman avek ou e zot pou pare pour swiv ou gidans.

11. Kwa ki kapab arive si paran pa abordab?

“PRAN LETAN AVAN KOZE”

12 Kan paran pa kontrol zot lemosyon e azir dan en fason negatif akoz sa ki zot zanfan in dir zot, sa osi i en baryer ki anpes annan en bon kominikasyon. I normal pour bann paran Kretyen anvi protez zot zanfan. Dan sa bann “dernyen zour” i annan bokou danze spirityel ek lezot ankor. (2 Tim. 3:1-5) Me, sa ki paran i konsider konman en proteksyon i pa neserman le ka pour zot zanfan.

13 Bann paran ki saz pa taye pour eksprim zot lopinyon. I vre ki i pa touzour fasil pour reste trankil kan zanfan i dir ou en keksoz ki fer ou enkyet, me i enportan pour ekout atantivman avan reponn. Salomon, en lerwa byen saz ti ekrire: “Kan en dimoun pe reponn konsernan en size avan ki i’n ekoute, sa i en enbesilite lo son par e i en imilyasyon pour li.” (Prov. 18:13) Si ou reste kalm ou pou konn plis e ou zanfan pou kontinyen eksprim li. Pour kapab arive ed li ou bezwen tann tou sa ki i annan pour dir. I kapab koz “an bonnavini,” e sa i petet en siny ki i konfize. (Zob 6:1-3) Konman bann paran ki kontan ou zanfan, servi ou zorey pour konpran e ou lalang pour geri.

12. Ki mannyer reaksyon paran i kapab vin en lobstak pour kominik avek zot zanfan?

13. Akoz paran i bezwen veye ki zot pa taye pour eksprim zot lopinyon?

14 Zanafan, ou osi ou bezwen “pran letan avan koze,” pa taye pour eksprim ou mekontantman kan ou paran i dir ou en keksoz, akoz devan Bondye se zot ki annan sa responsabilite pour elve ou. (Prov. 22:6) I kapab ki zot in eksperyans sa menm sityasyon ki ou pe fer fas avek. Deplis, zot regret fot ki zot in fer ler zot ti ankor zenn e vreman anvi protez ou pour ki ou pa komet menm lerer. Alor, pa konsider ou paran konman ou opozan, me konman ou zanmi, pa konsider li konman ou lennmi me konman ou konseye. (*Lir Proverb 1:5.**) “Respekte [ou] papa ek [ou] manman” e montre zot ki ou kontan zot parey zot kontan ou. Sa pou fer li pli fasil pour zot ‘elve ou dan en ledikasyon ek lenstriksyon Senyer.’—Efe. 6:2, 4.

“PRAN LETAN . . . AVAN PRAN LAKOLER”

15 Souvan nou pa pran pasyans avek bann dimoun ki nou kontan. ‘Pour bann sen ki reste dan Kolos, ek bann frer fidel Kris,’ zapot Pol ti ekrir: “Bann mari, kontan zot mandanm e pa tret zot dir [oubyen “pran lakoler avek zot,” *NW*]. Bann paran, pa bezwen provok zot zanafan, sa i kapab

* Proverb 1:5: “En dimoun saz pou ekoute e ganny plis lenstriksyon, e en zonn entelizan i devlop sa abilite pour donn bon gidans.”

14. Akoz zanafan i bezwen pran letan avan koze?

15. Kwa ki pou ed nou pa perdi pasyans e ankoler avek bann dimoun ki nou kontan?

dekouraz zot.” (Kol. 1:1, 2; 3:19, 21) Pol ti ankouraz bann Efezyen: “Debaras zot avek tou move santiman, tou iritasyon, tou lakoler. Fer disparet tou kriye ek lensilt.” (Efe. 4:31) Si bann paran i devlop bann laspe fri lespri parey pasyans, ladouser ek kontrol lo zot lekor, sa pou ed zot reste kalm menm kan zot anba presyon.—Gal. 5:22, 23.

16 Annou pran legzanp Zezi. Zis mazin sa presyon ki i ti santi sa zour swar kan i ti pe pran son dernyen repa avek son bann zapot. Zezi ti konnen ki dan detrwa erdtan ankor i ti pou sibir en lanmor martir. Pour ki non son Papa i ganny sanktifye e imen i ganny delivre, tousala ti depan lo son fidelite. Pourtan, i ti pandan sa repa ki bann zapot ti “konmans diskite antre zot lekel parmi zot ki ti pou ganny konsidere pli enportan.” Zezi pa ti kriye oubyen pran lakoler avek zot. O kontrer, avek ladouser, i ti rezonn avek zot. Zezi ti rapel zot ki zot ti’n reste fidel avek li pandan bann moman difisil. Kantmenm Satan ti demande pour sakouy zot parey dible, Zezi ti eksprim konfidans ki zot ti pou reste fidel. I ti menm fer en lalyans avek zot.—Lik 22:24-32.

17 Bann zanfan osi i bezwen reste kalm. Sirtou kan zot ariv laz adolesan zot kapab ganny sa lenpresyon ki zot paran pe donn zot gidans aköz zot napa konfyans dan zot.

16. Ki manner Zezi ti reprimann son bann zapot e aköz sa ti remarkab?

17. Kwa ki pou ed zanfan reste kalm?

Kantmenm parler ou kapab santi koumsa, pa oubliye ki ou paran i enterese avek ou e kontan ou. Si ou pare pour ekout zot e korpere, zot pou respekte ou e konsider ou konman en dimoun responsab. Sa bon latitid pou permet zot donn ou plis liberte dan serten domenn dan lavi. Annan kontrol lo nou lekor i mars ansanm avek lasazes. En proverb saz i dir: “En dimoun bet i tir tou son lakoler, me sa enn ki saz i kontrol li ziska lafen.”—Prov. 29:11.

18 Alor, paran ek zanfan, pa dekouraze si kominikasyon dan fanmir i pa parey ou ti pou kontan i ete. Kontinyen fer zefor e kontinyen mars dan laverite. (3 Zan 4) Dan nouvo lemonn kot tou dimoun pou parfe zot pou kapab kominik dan en fason parfe. Tou dimoun pou konpran kanmarad e personn pa pou pran lakoler. Me pour lemoman, nou tou nou fer keksoz ki nou regrete apre. Pa ezite alor pour demann leskiz. Touzour pare pour pardonnen. “Reste ini dan lanmour.” (Kol. 2:2) Lanmour i pwisan. ‘Lanmour i pasyan, e i bon. I pa pran lakoler, e i pa gard rankin. Lanmour i pardonn tou, i krwar tou, i esper tou, i siport tou.’ (1 Kor. 13:4-7) Kontinyen devlop lanmour, pour ki i annan en bon kominikasyon, an retour sa pou anmenn lazwa dan fanmir e louanz pour Zeova.

18. Ki mannyer lanmour i ede pour annan en bon kominikasyon?

Protez ou leritaz par fer bann bon desizyon

“Deteste sa ki mal e reste atase avek sa ki byen.”
—ROM. 12:9.

KI OU POU REPONN?

Ki manner ou pou dekrir nou leritaz spirityel?

Ki leson nou aprann avek bann aksyon Ezai?

Ki manner nou kapab protez nou leritaz?

BOKOU parmi nou in fer sa bon desizyon pour servi Zeova e swiv legzanp Zezi Kri. (Mat. 16:24; 1 Pyer 2:21) Nou pran nou dedikasyon anver Bondye vreman o serye. Nou ti fer sa swa apre ki nou’n etidye Parol Bondye o profon e non pa aköz en konnesans anler anler lo detrwa verse Labib. Atraver sa letid, nou’n aprann en kantite detay ki ranforsi nou lafwa an rapor avek sa leritaz ki Zeova pou donn sa bann ki aprann ‘konn li konman sel vre Bondye, ek Zezi-Kri ki i’n anvoye.’—Zan 17:3; Rom. 12:2.

2 Konman Kretyen nou devret fer bann swa ki fer plezir nou Papa ki dan lesyel. Alor, sa lartik pou egzamin sa bann kestyon

1, 2. (a) Ki manner ou’n arive fer sa desizyon pour servi Bondye? (b) Ki kestyon nou kapab demande konsernan nou leritaz spirityel?

enportan: Ki nou leritaz? Ki manner nou devret konsider li? Ki manner nou kapab fer sir ki nou ganny nou leritaz? Kwa ki pou ed nou fer bann bon swa?

KI NOU LERITAZ?

³ I annan en pti group Kretyen ki pe esper avek enpasyans pour ganny “en leritaz . . . ki pa kapab ni gate, ni sali, ni fletri,” e sa se sa privez pour renny avek Zezi dan lesyel. (1 Pyer 1:3, 4) Pour ganny sa leritaz, sa bann endividi i bezwen “ne de nouvo.” (Zan 3:1-3) Me ki leritaz sa plizyer milyon ‘lezot mouton’ Zezi ki ed son bann frer swazir pour pres sa bon nouvel lo Rwayonm Bondye? (Zan 10:16) Lezot mouton pou resevwar sa leritaz ki nou premye paran Adan ek Ev pa ti’n zanmen gannyen, zot pou resevwar lavi eternal dan paradi lo later kot pou napa ni soufrans, ni lanmor e ni dey. (Rev. 21:1-4) Zezi ti vremen kapab fer sa promes avek sa zonn ki ti akote li lo poto: ‘An verite, mon dir ou ozordi, ou pou avek mwan dan paradi.’ —Lik 23:43.

⁴ Menm la konmela nou pe benefisye avek serten laspe nou leritaz. Lefet ki nou egzers lafwa dan sakrifis Zezi, nou annan lape lespri e en relasyon pros avek Bondye. (Rom. 3:23-25) Nou annan en konprezon kler lo bann zoli promes ki dan Parol Bondye. Deplis, nou vremen zwaye vi ki nou form parti en

3. Ki leritaz bann (a) Kretyen swazir e (b) ‘lezot mouton’?

4. Ki benediksyon nou deza pe gannyen?

lasosyasyon frer ek ser ki enternasyonal. Pa i en gran privez ki nou en Temwen Zeova! Sanmenm i pa drol ki nou kontan nou leritaz!

5 Me, pour gard nou leritaz, fodre nou reste eveye kont bann taktik Satan. Satan in touzour esey enfliyans pep Bondye pour fer bann swa ki kapab fer zot perdi zot leritaz. (Nom. 25:1-3, 9) Vi ki i konnen i reste li en ptigin letan, Satan pe fer plis zefor ankor pour anbet nou. (*Lir Revelasyon 12:12, 17.*) Pour kapab kontinyen “reziste kont tou bann riz Dyab,” nou devret atoupri apresye nou leritaz. (Efe. 6:11) Dan sa domenn, nou kapab pran aker e tir en leson atraver move legzanp Ezai, premye garson Izaak.

PA BEZWEN VIN PAREY EZAI

6 Pros 4,000 an pase, Izaak ek Rebeka ti ganny en zimo ki ti apel Ezai ek Zakob. Anmezir sa zimo ti grandi, zot tanperaman ek zot kalite aktivite ti diferan. “Ezai ti vin en zonm ki ti konn fer lasas, i ti en zonm lakanpanny,” tandis ki “Zakob li i [ti] san repros, i ti reste dan latant.” (Zen. 25:27) En tradikter Labib apele Robert Alter i dir ki sa mo Ebre ki’n ganny tradwir “san repros” i “donn sa lide lentegrite oubyen menm linosans.”

7 Kan Ezai ek Zakob ti annan 15 an, zot granpapa Abraam

5. Ki Satan in esey fer avek pep Bondye e kwa ki kapab ed nou reziste son bann riz?

6, 7. Lekel Ezai e ki leritaz i ti kapab gannyen?

ti mor, me sa promes ki Zeova ti fer avek Abraam pa ti mor. Plitar, Zeova ti repet sa promes avek Izaak. I ti montre li ki tou bann nasyon lo later ti pou ganny beni atraver desandans Abram. (*Lir Zenez 26:3-5.**) Sa promes ti pe montre ki Mesi, sa “desandans” fidel dan Zenez 3:15 ti pou sorti dan fanmir Abram. Konman premye garson Izaak, Ezai ki ti annan drwa legal an rapor avek sa promes. Ezai ti annan en gran privelez, pa i vre! Eski i ti kontan sa privelez?

8 En zour, ler Ezai ti vini sorti dan lakanpanny, i ti vwar Zakob pe “fer en styou.” Ezai ti dir: “Depese silvouple, donn mwan en pe sa rouz la, sa rouz ki la akoz mon fatige!” Pour reponn li Zakob ti dir: “Premyerman, vann mwan ou drwa premye ne!” Ki desizyon Ezai ti fer? I ti dir: “Ki valer drwa premye ne i annan pour mwan?” Wi, Ezai ti pli vomye swazir en bol styou dan plas son drwa premye ne! Pour legaliz sa tranzaksyon, Zakob ti ensiste: “Avan tou, fer serman!” San okenn lezitasyon Ezai ti abandonn son drwa konman premye ne. Apre sa, “Zakob ti donn Ezai dipen ek styou lantiy e i ti konmans

* Zenez 26:3-5: “³ Reste konman en etranze dan sa pei, e mon pou kontinyen avek ou e beni ou, akoz avek ou ek ou desandans mon pou donn tou sa pei, e mon pou akonplir sa promes ki mon ti fer avek ou papa Abraam, ⁴ E mon pou miltipliy ou desandans parey zetwal dan lesyel e mon pou donn ou desandans tou sa pei e par mwayen ou desandans tou nasyon lo later pou ganny beni, ⁵ lefet ki Abraam ti ekout mon lavwa e kontinyen respekté son lobligasyon anver mwan, mon bann komannman, mon bann regilasyon e mon bann lalwa.”

8, 9. (a) Ki desizyon Ezai ti fer an rapor avek son leritaz? (b) Plizyer lan-nen plitar, ki Ezai ti realize konsernan son swa e ki mannyer i ti reazir?

manze e bwar. Apre sa i ti leve e fer son semen. Dan sa fason, Ezai ti mepriz son drwa konman premye ne.”—Zen. 25:29-34.

⁹ Plizyer lannen plitar, ler Izaak ti mazine i ti pros pour mor, Rebeka ti fer en laranzman pour fer sir ki Zakob i ganny sa drwa premye ne ki Ezai ti’n perdi. Kan Ezai ti realize plitar ki i ti’n fer en desizyon bet, i ti sipliy Izaak: “Beni mwan, menm mwan osi, mon papa! . . . Ou pa’n anmas okenn benediksyon pour mwan?” Letan Izaak ti dir li ki i pa ti pou kapab sanz sa benediksyon ki i ti’n fini donn Zakob, “Ezai ti kriye e konmans plere.”—Zen. 27:30-38.

¹⁰ Ki laspe dan latitud Ezai ki pli evidan dan Labib? I ti demontre ki satisfere son dezir laser ti pli enportan ki bann benediksyon ki i ti pou gannye atraver son leritaz. Ezai pa ti apresye son drwa konman premye ne e i evidan ki i pa ti vreman kontan Bondye. Deplis, Ezai pa ti fatig li avek lefe ki son aksyon ti pou annan lo son desandans. De lot kote, Zakob li i ti apresye son leritaz. Par egzanp, pour swazir en madanm, Zakob ti azir an armoni avek lenstriksyon son paran. (Zen. 27:46–28:3) Anliny avek sa, Zakob ti demontre pasyans ek en leta lespri sakrifis, e sa ti fer li vin en zanset Mesi. Ki mannyer Bondye ti konsider Ezai ek Zakob? Atraver profet Malaki, Zeova ti dir: “Mon ti kontan Zakob, e mon ti ay Ezai.”—Mal. 1: 2, 3.

10. Ki mannyer Zeova ti konsider Ezai ek Zakob e akoz?

11 Eski dan sa ki Labib i dir lo Ezai i annan en leson pour bann Kretyen ozordi? Definitivman wi. Zapot Pol ti averti son bann konpanyon Kretyen pour fer atansyon ki “personn pa anmenn en lavi imoral e mank respe pour keksoz sakre parey Ezai ki pour en sel repa ti vann son drwa konman en garson premye ne.” (Ebr. 12:16) Sa lavertisman i ankor aplikab pour bann Kretyen. Nou devret touzour demontre lapresyasyon pour bann keksoz sakre pour ki nou pa les nou ganny anvair par bann dezir natir imen ki pou fer nou perdi nou leritaz spirityel. Me, akoz Pol ti pe refer avek fornikasyon an rapor avek aksyon Ezai? Parski parey Ezai, dezir natir imen i kapab fer en dimoun fer fornikasyon e abandonn bann keksoz sakre zis pour li satisfè son bann dezir.

PREPAR OU LEKER LA KONMELA

12 Konman serviter Zeova, nou definitivman pa oule met nou dan bann sityasyon ki kapab fer nou fer bann keksoz imoral. Plito, nou priye ki Zeova i pa permet ki nou tonbe kan en dimoun i tant nou pour dezobeir li. (Mat. 6:13) Me, Satan i touzour pe esey afeblir nou spirityalite anmezir nou fer tou pour gard nou lentegrite dan sa lemonn koronpi. (Efe. 6:12) Konman bondye sa move lemonn, Dyab i konnen ki mannyer i pou

11. (a) Akoz legzanp Ezai i aplikab pour nou konman Kretyen? (b) Akoz Pol ti refer avek fornikasyon an rapor avek aksyon Ezai?

12. (a) Dan ki fason Satan i met tantasyon dan nou semen? (b) Donn bann legzanp dan Labib ki kapab ed nou kan nou annan desizyon difisil pour fer.

eksplwat nou bann dezir enparfe par diriz nou ver bann tantasyon ki souvan marse lo bann imen. (1 Kor. 10:8, 13) Par egzanp, meton ou dan en sityasyon kot ou annan sa loportinite pour satisfere en kek dezir dan en fason imoral? Ki desizyon ou ti pou fer? Eski ou ti pou parey Ezai e dir: ‘Depese, donn mwan!’ Ouswa ou ti pou reziste sa tantasyon e tay lwen avek li parey Zozef, garson Zakob ti fer ler i ti pe ganny tante avek madanm Potifar?—*Lir Zenez 39:10-12*.*

13 En kantite nou bann frer ek ser in tonm dan bann sityasyon kot zot ti bezwen swazir ant azir parey Ezai ouswa parey Zozef. Laplipar ti azir avek lasazes e rezwir leker Zeova. (Prov. 27:11) Me, kan zot fer fas avek tantasyon, serten konpanyon Kretyen i deside pour azir parey Ezai, zot met zot leritaz spirityel an danze. Anfet, sak lannen, i annan en kantite aksyon disiplinier ki ganny pran e bokou dimoun i ganny ekskli aköz limoralite seksyel. Pa i vreman enportan alor pour prepar nou leker la konmela, avan ki nou trouv nou dan bann sityasyon ki

* *Zenez 39:10-12*: “¹⁰ Alor, i ti arive ki [madanm Potifar] ti koz avek Zozef zour apre zour e [Zozef] pa ti zanmen ekout li pour dormi avek li, e pour reste avek li. ¹¹ E i ti arive ki sa zour, parey lezot zour, i ti antre dan lakaz pour fer son travay, e ni menm enn bann serviter pa ti la dan lakaz. ¹² Alor, [madanm Potifar] ti graponn [Zozef] par son lenz, an dizan: ‘Dormi avek mwan!’ Me i ti kit son lenz dan lanmen [madanm Potifar], taye e al deor.”

13. (a) Dan nou letan, ki mannyer bokou in azir parey Zozef, e ki mannyer serten in azir parey Ezai? (b) Legzanp bann ki azir parey Ezai i fer nou konsyan kwa?

teste nou lentegrite! (Ps. 78:8) Nou kapab pran omwen de pa konman en proteksyon kont tantasyon ki pou ed nou fer bann bon swa plitar.

REFLESIR E RANFORSI

14 Preme pa i enplik *reflesir lo konsekans nou aksyon*. Nou lapresyasyon pour nou leritaz spirityel i depan bokou lo profonder nou lanmour pour Zeova, sa Enn ki donn sa leritaz. Apre tou, si nou kontan en dimoun, nou pa pou anv i fer li di-tor. Plito, nou fer tou pour ganny son laprouvasyon. Vi ki sa i le ka, i byen pour pran en pe letan pour reflexir lo konsekans i pou annan lo nou ek lezot si nou les nou dezir imoral fer nou fer pese. Nou devret demann nou lekor: ‘Ki mannyer mon aksyon egois pou afekte mon relasyon avek Zeova? Ki lefe mon move aksyon pou annan lo mon fanmir? Ki lefe i pou annan lo mon bann frer ek ser spirityel? Eski mon kapab fer tonbe lezot?’ (Fili. 1:10) Nou osi kapab demande: ‘Eski satisfere mon dezir pour detruwa minit plezir i kapab ranplas sa lapenn ki mon swa pou anmennen? Eski mon vreman anv i rann lapel parey Ezai ki ti plere kan i ti realiz sa ki i ti’n fer?’ (Ebr. 12:17) Si nou reflexir lo bann kestyon parey, sa pou ed nou “deteste sa ki mal e reste atase avek sa ki byen.” (Rom. 12:9) Wi, lanmour pour Zeova pou sirman motiv nou pour reste atase avek nou leritaz.—Ps. 73:28.

14. Ki kestyon nou devret reflexir lo la ki pou ed nou “deteste sa ki mal e reste atase avek sa ki byen”?

15 Dezyenm pa i enplik *ranforsi nou defans*. Zeova in fer bokou provizyon pour ranforsi nou defans kont bann fakter dan sa lemond ki kapab en danze pour nou spirityalite. Sa bann provizyon i enplik letid Labib, renyon, predikasyon ek lapriyer. (1 Kor. 15:58) Sak fwa nou devid nou leker avek Zeova dan lapriyer e sak fwa ki nou partisip aktivman dan predikasyon, nou pe ranforsi nou defans kont tantasyon. (*Lir 1 Timote 6:12, 19.*) Ziska en serten degre, se nou zefor ki pou determinen ki degre for nou defans pou ete. (Gal. 6:7) Proverb sapit de i met lanfaz lo sa pwen.

“KONTINYEN ROD LI”

16 Proverb sapit 2 i ankouraz nou pour rod lasazes ek konprezon. Sa bann abilite i ed nou pour swazir ant sa ki byen ek sa ki mal, ant kontrol nou lekor e satisfere zis nou dezir. Pour arive fer sa i tou depan lo nou lanvi pour fer zefor. Pour met lanfaz lo sa laverite, Labib i dir: “Mon garson, *si* ou obei mon parol, apresye mon bann komannman parey en trezor, port latansyon lo lasazes avek ou zorey, afen ki ou a ouver ou leker ver disernman; *si*, an plis ki sa, ou kriy konprezon e ou fer tande ou lavwa ver disernman, *si* ou kontinyen rod li konmsi larzan, e *si* ou kontinyen rod li konmsi ou pe rod bann trezor kasyet, alor, ou pou konpran ki si sa lakrent pour Zeova, e ou

15. Kwa ki pou ranforsi nou defans kont bann danze spirityel?

16, 17. Dan ki fason nou kapab reisi devlop nou abilite pour fer bann bon desizyon?

pou trouv konnesans konsernan Bondye. Parski Zeova i donn lasazes; dan son labous i annan konnesans ek disernman.”
—Prov. 2:1-6.

17 Alor, i kler ki pour reisi annan sa abilite ki nou bezwen pour fer bann bon desizyon i depan lo si nou atenn sa bann rekomandasyon ki Proverb i koz lo la. Nou kapab reisi reste ferm kont tantasyon *si* nou les parol Zeova moul sa dimoun ki nou ete anndan, *si* nou persevere dan lapriyer pour ganny gidans Bondye e *si* nou kontinyen rod konnesans Bondye konmsi nou pe rod en trezor kasyet.

18 Zeova i donn konnesans, konprenezon, disernman ek lasazes sa bann ki fer bokou zefor pour rod sa bann abilite. Pli nou rod e servi zot, nou pou vin pli pros avek Zeova, sa Enn ki donn sa bann abilite. An retour, nou relasyon pros avek Zeova pou konman sa proteksyon kan nou pe ganny tante. Ler nou apros avek Zeova e annan lakrent pour li, sa pou protez nou e anpes nou tonm dan pese. (Ps. 25:14; Zak 4:8) Annou kontinyen annan en lanmitye avek Zeova e aplik lasazes Bondye pour ki nou ava kontinyen fer bann desizyon ki pou fer leker Zeova rezwir e protez nou leritaz.

18. Ki ou determinen pour kontinyen fer e aköz?